



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ**

**Ո Ր Ո Շ ՈՒ Մ**

20 նոյեմբերի 2019 թվականի №431Ա

ք. Երևան

**«ՀԱՅԱՍՏԱՆԻ ԷԼԵԿՏՐԱԿԱՆ ՑԱՆՑԵՐ» ԵՎ «ԲԱՐՁՐԱՎՈՒՏ ԷԼԵԿՏՐԱՑԱՆՑԵՐ» ՓԱԿ  
ԲԱԺՆԵՏԻՐԱԿԱՆ ԸՆԿԵՐՈՒԹՅՈՒՆՆԵՐԻՆ ՆԱԽԱԶԳՈՒՇԱՑՆԵԼՈՒ ՄԱՍԻՆ**

Հաշվի առնելով, որ՝

- ա) «Հայաստանի էլեկտրական ցանցեր» փակ բաժնետիրական ընկերության կողմից «ՏԵԼԻԱ ՄԱՅՆԻՆԳ» սահմանափակ պատասխանատվությամբ ընկերությանը 2017 թվականի դեկտեմբերի 15-ին տրամադրվել են №ՏՊ-570-110/0258 ԷԷՀ-ին միացման տեխնիկական պայմանները (այսուհետ՝ Տեխնիկական պայմաններ)՝ «Աստղաբերդ» փոքր հիդրոէլեկտրակայանի միացման կետ նշելով «Դավիթ Բեկ» 110 ԿՎ օդային գծի №61 խարսխային հենարանը,
- բ) ի պատասխան Հայաստանի Հանրապետության հանրային ծառայությունները կարգավորող հանձնաժողովի 2019 թվականի սեպտեմբերի 24-ի №ԿՍ/34.1-Ղ4-2/2640-19 գրության՝ «Հայաստանի էլեկտրական ցանցեր» փակ բաժնետիրական ընկերությունը 2019 թվականի հոկտեմբերի 9-ի №386-19 գրությամբ հայտնել է, որ «Դավիթ Բեկ» 110 ԿՎ օդային գծի №61 հենարանը պատկանում է «Բարձրավոլտ էլեկտրացանցեր» փակ բաժնետիրական ընկերությանը, իսկ «Դավիթ Բեկ» 110 ԿՎ օդային գիծը մինչև «Բարձրավոլտ էլեկտրացանցեր» փակ բաժնետիրական ընկերության վարկային ծրագրով №49-№117 հենարանների միջև ընկած հատվածի տեղափոխումը ամբողջությամբ գտնվել է ընկերության հաշվեկշռում, միևնույն ժամանակ հայտնել է, որ դիմել է «Բարձրավոլտ էլեկտրացանցեր» փակ բաժնետիրական ընկերություն՝ նշված հատվածը հանձնելու «Հայաստանի էլեկտրական ցանցեր» փակ բաժնետիրական ընկերության հաշվեկշիռ,
- գ) Հայաստանի Հանրապետության հանրային ծառայությունները կարգավորող հանձնաժողովը 2019 թվականի հոկտեմբերի 17-ից հարուցել է վարչական

վարույթ՝ Տեխնիկական պայմանները հանձնաժողովի 2007 թվականի հուլիսի 27-ի №314Ն որոշմամբ հաստատված՝ բաշխման ցանցին էլեկտրաէներգիա արտադրող կայանների միանալու կարգի (այսուհետ՝ Կարգ) պահանջների հնարավոր խախտմամբ տրամադրման փաստի ուսումնասիրության նպատակով,

- դ) վարչական վարույթի շրջանակում «Հայաստանի էլեկտրական ցանցեր» փակ բաժնետիրական ընկերությունը 2019 թվականի հոկտեմբերի 25-ի №411-19 և նոյեմբերի 11-ի №439-19 գրություններով հայտնել է, որ Տեխնիկական պայմանները տրամադրվել են՝ հիմք ընդունելով այն հանգամանքը, որ ինքն է օպերատիվ կառավարում և շահագործում «Դավիթ Բեկ» 110 ԿՎ օդային գիծը և, առաջնորդվելով Կարգի 2.5-րդ կետի պահանջներով (միացման աշխատանքները նվազագույն ծախսումներով իրականացնելու պայմանով), ինչպես նաև ստանալով «Բարձրավոլտ էլեկտրացանցեր» փակ բաժնետիրական ընկերության բանավոր համաձայնությունը, որը հիմնավորվում է «Բարձրավոլտ էլեկտրացանցեր» փակ բաժնետիրական ընկերության տեխնիկական տնօրենի 2018 թվականի հունիսի 18-ի №1-03/693 գրությամբ և 2018 թվականի հուլիսի 16-ի №1-01/96 կարգադրությամբ,
- ե) վարչական վարույթի շրջանակում «Բարձրավոլտ էլեկտրացանցեր» փակ բաժնետիրական ընկերությունը սույն թվականի նոյեմբերի 5-ի №01/1453-19 գրությամբ հայտնել է, որ հաշվի առնելով, որ 32,3 կմ երկարությամբ «Դավիթ Բեկ» 110 ԿՎ օդային գծի միայն 12,3 կմ հատվածն է գտնվում վերջինիս հաշվեկշռում, նշված օդային գծի օպերատիվ կառավարումն ու ղեկավարումն իրականացվում է «Հայաստանի էլեկտրական ցանցեր» փակ բաժնետիրական ընկերության կողմից, իսկ «ՏԵԼԻԱ ՄԱՅՆԻՆԳ» սահմանափակ պատասխանատվությամբ ընկերության «Աստղաբերդ» փոքր հիդրոէլեկտրակայանի դրվածքային հզորությունը կազմում է 7,7ՄՎտ և չի հանդիսանում որակավորված արտադրող, ինչպես նաև այն, որ Կարգի 2.5-րդ կետի պահանջի համաձայն միացման աշխատանքները պետք է կատարվեն նվազագույն ծախսումներով իրականացնելու պայմանով, վերջինս չի խոչընդոտել «Աստղաբերդ» փոքր հիդրոէլեկտրակայանի ցանցին միացումը,

- զ) վարչական վարույթի ժամկետը՝ հիմք ընդունելով «Վարչարարության հիմունքների և վարչական վարույթի մասին» ՀՀ օրենքի 47-րդ հոդվածի 1-ին մասի «ա» կետը և 2-րդ մասը 10 օրով երկարաձգվել է,
- է) Կարգի 2.1-րդ կետի համաձայն՝ էլեկտրական էներգիայի (հզորության) բաշխման լիցենզիա ունեցող անձի էլեկտրական ցանցին նոր կայանների միացման աշխատանքների նախագծերը մշակելու համար անհրաժեշտ տեխնիկական պայմանները կառուցողին առաջադրում է բաշխողը,
- ը) Հայաստանի Հանրապետության հանրային ծառայությունները կարգավորող հանձնաժողովի 2017 թվականի մայիսի 17-ի №161Ն որոշմամբ հաստատված Հայաստանի Հանրապետության էլեկտրաէներգետիկական համակարգի ցանցային կանոնների (այսուհետ՝ Ցանցային կանոններ) 190-րդ կետի համաձայն՝ հաղորդման ցանցին հզորություն միացնելու իրավունք ունեն որակավորված արտադրողը, բաշխողը և որակավորված սպառողները, իսկ Ցանցային կանոնների 3-րդ կետի 46-րդ ենթակետի համաձայն՝ որակավորված արտադրող է համարվում 10 ՄՎտ և ավելի դրվածքային հզորությամբ էլեկտրական էներգիայի (հզորության) արտադրության լիցենզիա ունեցող անձը, որպիսին «ՏԵԼԻԱ ՄԱՅՆԻՆԳ» սահմանափակ պատասխանատվությամբ ընկերությունը չի հանդիսանում,
- թ) հարուցված վարչական վարույթի շրջանակում փաստվել է, որ «Հայաստանի էլեկտրական ցանցեր» փակ բաժնետիրական ընկերությունը խախտել է Կարգի 2.1-րդ կետը, իսկ «Բարձրավոլտ էլեկտրացանցեր» փակ բաժնետիրական ընկերությունը՝ Ցանցային կանոնների 190-րդ կետը,

և հիմք ընդունելով «Էներգետիկայի մասին» Հայաստանի Հանրապետության օրենքի 42-րդ հոդվածի 1-ին, 4-րդ և 9-րդ կետերը՝ Հայաստանի Հանրապետության հանրային ծառայությունները կարգավորող հանձնաժողովը **որոշում է.**

1. Կարգի 2.1-րդ կետի խախտման համար «Հայաստանի էլեկտրական ցանցեր» փակ բաժնետիրական ընկերությանը նախազգուշացնել:
2. Ցանցային կանոնների 190-րդ կետի խախտման համար «Բարձրավոլտ էլեկտրացանցեր» փակ բաժնետիրական ընկերությանը նախազգուշացնել:
3. «Հայաստանի էլեկտրական ցանցեր» և «Բարձրավոլտ էլեկտրացանցեր» փակ բաժնետիրական ընկերություններին՝ սույն որոշումն ուժի մետ մտնելու պահից տասնհինգօրյա ժամկետում համատեղ քննարկել և Հանձնաժողով ներկայացնել

Տեխնիկական պայմանները Կարգի պահանջներին համապատասխանեցնելու վերաբերյալ առաջարկություն:

4. «Հայաստանի էլեկտրական ցանցեր» և «Բարձրավոլտ էլեկտրացանցեր» փակ բաժնետիրական ընկերություններին՝ ընդունել ի գիտություն, որ իրավասու են սույն որոշումն ուժի մեջ մտնելու պահից երկամսյա ժամկետում այն բողոքարկել Հայաստանի Հանրապետության հանրային ծառայությունները կարգավորող հանձնաժողով կամ Հայաստանի Հանրապետության վարչական դատարան:
5. Սույն որոշումն ուժի մեջ է մտնում «Հայաստանի էլեկտրական ցանցեր» և «Բարձրավոլտ էլեկտրացանցեր» փակ բաժնետիրական ընկերություններին օրենքով սահմանված կարգով իրազեկելուն հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ  
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ  
ՀԱՆՁՆԱԺՈՂՈՎԻ ՆԱԽԱԳԱՀ՝**

ք. Երևան  
20 նոյեմբերի 2019թ.



**Գ. ԲԱՆՈՒՐԱՍՅԱՆ**